



Curaglia, 2 da settember 2021

Encuretgs commembers per la cumissiun da turissem!

Cunquei che la «Uniun da cura e traffic» exista dapi daditg buca pli sco uniun, ei quella incarica stada surdada alla suprastonza communal. La suprastonza communal ha giu il giavisch da reorganisar la responsabladad da niev. Aschia ei l'idea vegnida sviluppada da remplazzar l'uniun entras ina cumissiun da turissem. Quella dueigi esser ina organisaziun semplia e surprender il svilup strategic dalla destinaziun «Val Medel». L'entschatta fenadur ha la radunonza da vischnaunca approbau la revisiun dalla lescha da turissem che era necessaria per fundar la cumissiun.

Sin ils 1 da schaner 2022 dueigi la cumissiun da turissem Val Medel vegnir fundada. Il gerau Werner Venzin ei il representat dalla suprastonza communal. Daniela Kienzler vegn a surprender ils pensums operativs, realisar las decisiuns dalla cumissiun ed organisar las sedutas dalla cumissiun.

Ussa vegnan Medelins*as interessai encuretgs che ein promts da s'engaschar pil svilup turistic dalla Val Medel.

- Per la cumissiun turistica drova ei 2-4 persunas cun domicil en vischnaunca!
- Ils commembers dalla cumissiun vegnan eligi dalla suprastonza communal.
- La cumissiun turistica s'entaupa min. 4 gadas per onn per sviluppar las decisiuns strategicas, las ideas ed ils accents e per fixar il preventiv.
- Ils commembers dalla cumissiun vegnan indemnissai tenor las statutas dalla vischnaunca da Medel (Lucmagn) cun CHF 40 per seduta.

Possessurs da secundas habitaziuns ella cumissiun da turissem

Tenor la lescha da turissem san persunas da secundas habitaziuns separticipar a moda consultativa en la cumissiun. Essend che la cumissiun ei tenor lescha in organ dalla vischnaunca san mo persunas cun domicil en vischnaunca vegnir elegidas sco commembers cun dretg da vuschar. Alla suprastonza communal schai ei a pèz che era possessurs da secundas habitaziuns - che portan ina part essenziala dallas taxas da turissem – han la pussevividad da collaborar en la cumissiun da turissem.

Sche Vus leis s'engaschar en la cumissiun da turissem, sche s'annunziei entochen ils **24 da settember 2021** tier Daniela Kienzler dkienzler@medel.ch. Per damondas stat Daniela Kienzler ni la canzlia communal bugen a disposiziun.